

現代生活藝術系列

華嚴經疏論纂要 95

— 離世間品之六

華藏淨宗學會印贈

大方廣佛華嚴經疏論纂要卷第九十五

五臺山清涼國師澄觀疏鈔

太原方山長者李通玄 論

閩鼓山私淑比丘道霈纂要

離世間品第三十八

之六

佛子。菩薩摩訶薩有十種清淨施。何等爲十。所謂平等施。不揀衆生故。隨意施。滿其所願故。不亂施。令得利益故。隨宜施。知上中下故。不住施。不求果報故。開捨施。心不戀著故。一切施。究竟清淨故。迴向菩提施。遠離有爲無爲故。教化衆生施。乃至道場不捨故。三

輪清淨施於施者受者及以施物正念觀察如虛空故是爲十。若諸菩薩安住此法則得如來無上清淨廣大施。

〔疏〕第二十種施下十門明其行體於中先明六度。後顯四等。十度之義已如前釋。皆言清淨者離蔽障故。不同世間施戒等故。然皆寄十表圓。各爲一義。與九三施等開合不同。若具會釋。恐厭繁文。故隨顯直釋。鈔三施者。卽財法無畏九施。卽一自性二一切三難行四一切門五善十六一切種七遂求八二世樂九清淨乃至六度四攝。皆有此九。十行之初已廣說竟。今初十施者。一無向背施。卽清淨施中別義。二遂求施。三二

世樂施。梵本名應時。及濟難故。餘七皆一切施。三世樂者。二世樂有九。今亦唯二。所以引梵本者。不亂之言。不順二世樂。以應時濟難。順二世樂故。餘七皆一切施者。一切卽是三世。然亦九中之一。然一切有二。一內外之二。二有其三。卽財法無畏。故下結中。十皆通三。今前三有其別相。四卽觀其可。後七無餘施別相。故云卽一切耳。

不。有損不宜等。極貧下者。應先施等。五不希異熟。亦清淨施。六亦難行施。所愛重物。無戀著故。七內外財等。無不捨故。八九與十。皆巧惠施。此迴向巧治二過故。一觀諸行。性不堅牢。治於當果有爲。見勝功德。二由具大悲。治於二乘。趣證無爲。故行不住道。而向善提。九益生施。常以財法施之。故名不

捨十忘相成度。然其十度皆有二輪。而義有小異。佛子。菩薩摩訶薩有十種清淨戒。何等爲十。所謂身清淨戒。護身三惡故。語清淨戒。離語四過故。心清淨戒。永離貪瞋邪見故。不破一切學處清淨戒。於一切人天中作尊主故。守護菩提心清淨戒。不樂小乘故。守護如來所制清淨戒。乃至微細罪生大怖畏故。隱密護持清淨戒。善拔犯戒衆生故。不作一切惡清淨戒。誓修一切善法故。遠離一切有見清淨戒。於戒無著故。守護一切衆生清淨戒。發起大悲故。是爲十。若諸菩薩安住此法。則得如來無上無過失清淨戒。

〔疏〕二十戒者。前三律儀。七十攝生。餘皆攝善。

佛子。菩薩摩訶薩。有十種清淨忍。何等爲十。所謂安
受。些辱。清淨忍。護諸衆生故。安受刀杖。清淨忍。善護
自他故。不生恚害。清淨忍。其心不動故。不責卑賤。清
淨忍。爲上能寬。故有歸。咸救。清淨忍。捨自身命。故。遠
離我慢。清淨忍。不輕未學。故。殘毀不瞋。清淨忍。觀察
如幻。故。有犯無報。清淨忍。不見自他。故。不隨煩惱。清
淨忍。離諸境界。故。隨順菩薩。眞實智。知一切法。無生
清淨忍。不由他教。入一切智境界。故。是爲十。若諸菩
薩。安住其中。則得一切諸佛。不由他悟。無上法忍。

〔疏〕三十忍者。初三耐冤害忍。忍他三業惱害故。次
三安受苦忍。初後忍不稱情。中一忍身苦以濟物。
後二諦察法忍。七八通三忍。又四難行忍。於下能
忍。恕不逮故。五亡身濟難。六忍已順他。皆遂求忍。
餘如前判。鈔又四難行忍。下約三忍。今約九忍。難
行有三。今是其一。於下能忍。是一難行。
對於上流。生忍則易。童僕子息。生忍則難。彼合敬
順。我合責罰。故言恕不逮者。卽晉書中意。晉衛洗
馬。凡所發言。皆爲實錄。時有一人。非理相忤。後有
僕使。所爲非理。於此二人。並無愠色。人問其故。彼
對之曰。非理相干。可以理遣。人之不逮。可以情恕。
故云。恕不逮。故以釋經中爲上能寬。此亦外典謂
居上能寬。爲下能
敬。君子之行也。

佛子。菩薩摩訶薩。有十種清淨精進。何等爲十。所謂

身清淨精進。承事供養諸佛菩薩及諸師長尊重。福田不退轉故。語清淨精進。隨所聞法廣爲他說讚佛功德無疲倦故。意清淨精進。善能入出慈悲喜捨禪定解脫及諸三昧無休息故。正直心清淨精進。無誑無諂無曲無僞。一切勤修無退轉故。增勝心清淨精進。志常趣求上上智慧。願具一切白淨法故。不唐捐清淨精進。攝取布施戒忍多聞及不放逸。乃至菩提。無中息故。摧伏一切魔。清淨精進。悉能除滅貪欲瞋恚愚癡邪見。一切煩惱諸纏蓋故。成滿智慧光清淨精進。有所施爲。悉善觀察。咸使究竟。不令後悔。得一

切佛不共法故。無來無去清淨精進。得如實智。入法界門。身語及心。皆悉平等。了相非相。無所著故。成就法光清淨精進。超過諸地。得佛灌頂。以無漏身而示。歿生。出家成道。說法滅度。具足如是普賢事故。是爲十。若諸菩薩安住此法。則得如來無上大清淨精進。

疏四十精進中。二與第十。是饒益有情。五是被甲。餘皆攝善。又初三三業。卽精進自體。四離染法。五引白法。上二一切門精進。六無所棄捨。及無所退減。七無下劣。八無顛倒。及勤勇加行。上三卽善士精進。九平等相應。卽一切種精進。上皆自分。十卽

勝進廻向菩提清淨精進

佛子。菩薩摩訶薩有十種清淨禪。何等爲十。所謂常樂出家清淨禪。捨一切所有故。得真善友清淨禪。示教正道故。住阿蘭若忍風雨等清淨禪。離我我所故。離憤鬧衆生清淨禪。常樂寂靜故。心業調柔清淨禪。守護諸根故。心智寂滅清淨禪。一切音聲諸禪定刺不能亂故。覺道方便清淨禪。觀察一切皆現證故。離於味著清淨禪。不捨欲界故。發起通明清淨禪。知一切衆生根性故。自在遊戲清淨禪。入佛三昧知無我故。是爲十。若諸菩薩安住其中。則得如來無上大清

淨禪

〔疏〕五十禪中。初五方便。次一正定。堅成。次二發慧。斷惑。上八現法樂住禪。九利益衆生禪。十引生功

德禪

佛子。菩薩摩訶薩。有十種清淨慧。何等爲十。所謂知一切因清淨慧。不壞果報故。知一切緣清淨慧。不違和合故。知不斷不常清淨慧。了達緣起。皆如實故。拔一切見清淨慧。於衆生相。無取捨故。觀一切衆生。心行清淨慧。了知如幻故。廣大辯才清淨慧。分別諸法。問答無礙故。一切諸魔。外道聲聞。獨覺。所不能知。清

淨慧深入一切如來智故。見一切佛微妙法身。見一切衆生本性清淨。見一切法皆悉寂滅。見一切刹同於虛空清淨慧。知一切相皆無礙故。一切總持辯才方便波羅蜜清淨慧。令得一切最勝智故。一念相應金剛智。了一切法平等清淨慧。得一切法最尊智故。是爲十。若諸菩薩安住其中。則得如來無障礙大智慧。

〔疏〕六有十慧。初三解法。卽加行慧。次四攝生。卽後得慧。後三證理。卽正體慧。

佛子。菩薩摩訶薩有十種清淨慈。何等爲十。所謂等

心清淨慈。普攝衆生無所揀擇故。饒益清淨慈。隨有所作皆令歡喜故。攝物同已清淨慈。究竟皆令出生死故。不捨世間清淨慈。心常緣念集善根故。能至解脫清淨慈。普使衆生除滅一切諸煩惱故。出生菩提清淨慈。普使衆生發求一切智心故。世間無礙清淨慈。放大光明平等普照故。充滿虛空清淨慈。救護衆生無處不至故。法緣清淨慈。證於如如真實法故。無緣清淨慈。入於菩薩離生性故。是爲十。若諸菩薩安住此法。則得如來無上廣大清淨慈。

〔疏〕第二四門明四等者。六度多明自利。四等多約

利他。然四等於境有別已見十地。今文從通。但與樂等。以爲顯別。今初明慈。前八衆生緣。九十顯然。瑜伽四十四。三緣之中。初共外道。次共二乘。後方不共。此中三緣。皆不共凡小。如文思之。

佛子。菩薩摩訶薩。有十種清淨悲。何等爲十。所謂無儔伴清淨悲。獨發其心故。無疲厭清淨悲。代一切衆生受苦。不以爲勞故。難處受生清淨悲。爲度衆生故。善趣受生清淨悲。示現無常故。爲邪定衆生清淨悲。歷劫不捨弘誓故。不著已樂清淨悲。普與衆生快樂故。不求恩報清淨悲。修潔其心故。能除顛倒清淨悲。

說如實法故。菩薩摩訶薩知一切法本性清淨。無染著。無熱惱。以客塵煩惱故而受衆苦。如是知己。於諸衆生而起大悲。名本性清淨。爲說無垢清淨光明法。故菩薩摩訶薩知一切法如空中鳥跡。衆生癡翳不能照了。觀察於彼起大悲心。名真實智。爲其開示涅槃法故。是爲十。若諸菩薩安住此法。則得如來無上廣大清淨悲。

疏二有十悲。前七衆生緣。次一法緣。後二無緣。於中初傷其真隱。故爲顯。後念彼不知。故令悟。

佛子。菩薩摩訶薩有十種清淨喜。何等爲十。所謂發

菩提心清淨喜。悉捨所有清淨喜。不嫌棄破戒衆生。而教化成就清淨喜。能忍受造惡衆生。誓願救度清淨喜。捨身求法。不生悔心。清淨喜。自捨欲樂。常樂法樂。清淨喜。令一切衆生捨資生樂。常樂法樂。清淨喜。見一切佛恭敬供養。無有厭足。法界平等。清淨喜。令一切衆生愛樂禪定。解脫三昧。遊戲入出清淨喜。心樂具行。順菩薩道。一切苦行。證得牟尼寂靜。不動無上定。慧清淨喜。是爲十。若諸菩薩安住此法。則得如來無上廣大清淨喜。

疏三有十喜。初四衆生緣。次三法緣。後三無緣。

佛子。菩薩摩訶薩有十種清淨捨。何等爲十。所謂一
切衆生恭敬供養不生愛著清淨捨。一切衆生輕慢
毀辱不生瞋恚清淨捨。常行世間不爲世間八法所
染清淨捨。於法器衆生待時而化。於無法器亦不生
嫌清淨捨。不求二乘學無學法清淨捨。心常遠離一
切欲樂順煩惱法清淨捨。不歎二乘厭離生死清淨
捨。遠離一切世間語。非涅槃語非離欲語不順理語
惱亂他語。聲聞獨覺語。略說乃至一切障菩薩道語
皆悉遠離清淨捨。或有衆生根已成熟發生念慧而
未能知最上之法待時方化清淨捨。或有衆生菩薩

往昔已曾教化。至於佛地方可調伏。彼亦待時清淨捨菩薩摩訶薩。於彼二人無高無下。無取無捨。遠離一切種種分別。恒住正定。入如實法。心得堪忍。清淨捨。是爲十。若諸菩薩安住其中。則得如來無上廣大清淨捨。

疏四有十捨。文列十一。晉本初二。但合爲一。於中

初四衆生緣。次六法緣。後一無緣。上明行體竟。

補

註曰。法器衆生者。是有可化之器也。待時而化者。謂器雖可化。亦須待時。苟化不待時。而欲其速成。是日中灌瓜。匪徒無益。反成其生也。凡爲人師者。授受之際。可不慎哉。

佛子。菩薩摩訶薩有十種義。何等爲十。所謂多聞義。

堅固修行故。法義善巧思擇故。空義第一義空故。寂靜義離諸衆生誼憤故。不可說義不著一切語言故。如實義了達三世平等故。法界義一切諸法一味故。眞如義一切如來順入故。實際義了知究竟如實故。大般涅槃義滅一切苦而修菩薩諸行故。是爲十。若諸菩薩安住此法。則得一切智無上義。

〔疏〕第二十義下八門。明造修方便行。於中前五門。明自分行。後三門明勝進行。前中初二明法義次。一二說福智。後一顯圓足。今初以彼法義成行故。若以能詮爲法。則以所詮爲義。今此不取能詮爲法。

然法約自體。義是所以。法總義別。餘如九地四無礙中辨。今初十義。一以修行爲多聞之義。意在於修。不在聞故。淨名亦云。多聞是道場。如聞行故。二思爲法家之義。餘做此知。法卽事法。餘八理法。理法所以在於證入。

佛子。菩薩摩訶薩有十種法。何等爲十。所謂眞實法。如說修行故。離取法。能取所取。悉離故。無諍法。無有一切惑諍故。寂滅法。滅除一切熱惱故。離欲法。一切貪欲皆斷故。無分別法。攀緣分別永息故。無生法。猶如虛空不動故。無爲法。離生住滅諸相故。本性法。自

性無染清淨故。捨一切烏波提涅槃法。能生一切菩薩行。修習不斷故。是爲十。若諸菩薩安住其中。則得如來無上廣大法。

〔疏〕二有十法。法有二義。一持自性。二軌生物解。今此前七通二。八九唯自性。後一唯軌生。烏波提者。此云有苦。卽二乘涅槃。佛性論第二說。二乘無餘。尙有三餘。一無明住地惑。二無漏業。三變易苦。故非真無餘。今以涅槃爲安樂義。畧舉有苦。故應捨之。軌令衆生不應修此。

佛子。菩薩摩訶薩有十種福德助道具。何等爲十。所

謂勸衆生起菩提心。是菩薩福德助道具。不斷三寶種故。隨順十種迴向。是菩薩福德助道具。斷一切不善法集。一切善法故。智慧誘誨。是菩薩福德助道具。超過三界福德故。心無疲倦。是菩薩福德助道具。究竟度脫一切衆生故。悉捨內外一切所有。是菩薩福德助道具。於一切物無所著故。爲滿足相好精進不退。是菩薩福德助道具。開門大施無所限故。上中下三品善根。悉以迴向無上菩提。心無所輕。是菩薩福德助道具。善巧方便相應故。於邪定下劣不善衆生。皆生大悲。不懷輕賤。是菩薩福德助道具。常起大人。

弘誓心故。恭敬供養一切如來。於一切菩薩起如來想。令一切衆生皆生歡喜。是菩薩福德助道具。守本志願極堅牢故。菩薩摩訶薩於阿僧祇劫。積集善根。自欲取證無上菩提。如在掌中。然悉捨與一切衆生。心無憂惱。亦無悔恨。其心廣大等虚空界。此是菩薩福德助道具。起大智慧證大法故。是爲十。若諸菩薩安住其中。則具足如來無上廣大福德聚。

疏第二二門明福智者。福智卽道。成福智緣。名助道具。如云三寶不斷是福。勸衆生發爲緣等。又具一二莊嚴。方爲正道。偏語皆助。斯則福智卽助道具。

又以正道。福智相絕故。故文中說法布施。皆卽是福。非福緣故。今初福德中。二順迴向因。七不雜小善。迴向於果。餘可知。

佛子。菩薩摩訶薩。有十種智慧助道具。何等爲十。所謂親近多聞。眞善知識。恭敬供養。尊重禮拜。種種隨順。不違其教。是爲一。一切正直。無虛矯故。

〔疏〕二智慧具中。一外近善緣。

永離憍慢。常行謙敬。身語意業。無有麤獷。柔和善順。不僞不曲。是爲二。其身堪作佛法器故。

〔疏〕二內調法器。

念慧隨覺未曾散亂。慙愧柔和心安不動。常憶六念。常行六敬。常隨順住六堅固法。是爲三與十種智爲方便故。

〔疏〕三念慧安處。六念自持。六和衆法。並見上文。六堅順位。本業上卷。以三賢十聖等妙。二覺爲六。謂信堅。法堅。修堅。德堅。頂堅。覺堅。亦名六忍。謂信。法。修。正。無垢。一切智。復名六慧。謂聞。思。修。無相。照。寂。寂。照。復名六觀。謂任。行。向。地。無。相。一。切。種。智。卽亦六性。謂習。種。性。等。一。切。諸。佛。無。不。入。此。故。常。隨。順。十。種。智。者。謂。法。智。比。智。他。心。智。世。智。四。諦。智。盡。智。

無生智

樂法樂義。以法爲樂。常樂聽聞。無有厭足。捨離世論。及世言說。專心聽受。出世間語。遠離小乘。入大乘慧。是爲四。一心憶念無散動故。

疏四法樂怡神。

六波羅蜜。心專荷負。四種梵住。行已成熟。隨順明法。悉善修行。聰敏智人。皆勤請問。遠離惡趣。歸向善道。心常愛樂。正念觀察。調伏已情。守護他意。是爲五。堅固修行。真實行故。

疏五真實修行。

常樂出離。不著三有。恒覺自心。曾無惡念。三覺已絕。三業皆善。決定了知心之自性。是爲六。能令自他心清淨故。

〔疏〕六自他雙淨。言三覺者。欲恚害也。

觀察五蘊。皆如幻事。界如毒蛇。處如空聚。一切諸法。如幻。如燄。如水。中月。如夢。如影。如響。如像。如空中畫。如旋火輪。如虹蜺色。如日月光。無相無形。非常非斷。不來不去。亦無所住。如是觀察。知一切法。無生無滅。是爲七。知一切法。性空寂故。

〔疏〕七徧觀法性。界如毒蛇者。淨名涅槃。皆以四大

爲毒蛇。性違害。故今居蘊入之中。義當十八界。以四大卽內界。故俱舍云。大種。謂四界。今取總中別義。亦可十八界。皆不可執取處。如空聚者。中無人。故竝如涅槃二十三說。

菩薩摩訶薩。聞一切法。無我。無衆生。無壽者。無補伽羅。無心。無境。無貪。瞋。癡。無身。無物。無主。無待。無著。無行。如是一切。皆無所有。悉歸寂滅。聞已。深信不疑。不謗。是爲八。以能成就圓滿解故。

疏八深解二空。無心已下。明其法空。

菩薩摩訶薩。善調諸根。如理修行。恒住止觀。心意寂

靜。一切動念皆悉不生。無我無人。無作無行。無計我想。無計我業。無有瘡疣。無有癩痕。亦無於此所得之忍。身語意業無來無去。無有精進。亦無勇猛。觀一切衆生一切諸法。心皆平等而無所住。非此岸。非彼岸。此彼性離。無所從來。無所至去。常以智慧如是思惟。是爲九到分別相彼岸處故。

〔疏〕九止觀雙游。於中先總修止觀。後心意下。雙釋二門。先釋止欲。取我相爲我想。正計爲我業。正損法身爲瘡疣。餘過未滅爲癩痕。能所忍寂。故無來去。後觀一切下。釋觀說。雖先後運在一時。

菩薩摩訶薩。見緣起法故。見法清淨。見法清淨故。見
國土清淨。見國土清淨故。見虛空清淨。見虛空清淨
故。見法界清淨。見法界清淨故。見智慧清淨。是爲十。
修行積集一切智故。佛子。是爲菩薩摩訶薩十種智
慧助道具。若諸菩薩安住此法。則得如來一切法無
障礙清淨微妙智慧聚。

〔疏〕十修集種智。謂見法從緣。則知國由心現。國由
心現故。有而卽空。空爲法性。萬法由生。見法性源。
是真智慧。皆離妄垢。並云清淨。五重積集。一切智

圓

佛子。菩薩摩訶薩有十種明足。何等爲十。所謂善分別諸法明足。不取著諸法明足。離顛倒見明足。智慧光照諸根明足。巧發起正精進明足。能深入真諦智明足。滅煩惱業成就盡智無生智明足。天眼智。普觀察明足。宿住念。知前際清淨明足。漏盡神通智。斷衆生諸漏明足。是爲十。若諸菩薩安住此法。則得如來於一切佛法無上大光明。

〔疏〕第三明足者。總顯圓足。惑闇斯亡。智解斯顯。故稱爲明。足有二義。一智圓備故。二有進趣故。其猶脚足斯卽十號明。行足義。果稱圓足。因爲脚足。又

準涅槃十八。以明爲果。所謂菩提。以行爲足。謂戒定等。廣如彼說。此居等覺。義通二足。望脚足義。此門亦得名爲勝進。十中前七約行。後三別舉。三明。自分行竟。

佛子。菩薩摩訶薩。有十種求法。何等爲十。所謂直心求法。無有諂誑故。精進求法。遠離懈怠故。一向求法。不惜身命故。爲除一切衆生煩惱求法。不爲名利恭敬故。爲饒益自他一切衆生求法。不但自利故。爲入智慧求法。不樂文字故。爲出生死求法。不貪世樂故。爲度衆生求法。發菩提心故。爲斷一切衆生疑求法。

令無猶豫故。爲滿足佛法求法。不樂餘乘故。是爲十。
若諸菩薩安住此法。則得不由他教。一切佛法大智
慧。

〔疏〕第二有十種求法。下三門明勝進行。一更求法
要。二得已明了。三如說修行。今初依此成行故。一
始心唯直。二中後無懈。三內不顧身。四外亡名利。
五雙圓。六得意亡言。七果不近求。八因酬所
爲。九普決疑惑。十唯滿佛乘。離此十求。皆邪求也。
佛子。菩薩摩訶薩有十種明了法。何等爲十。所謂隨
順世俗生長善根。是童蒙。凡夫明了法。得無礙不壞。

信覺法自性。是隨信行人明了法。勤修習法隨順法。住。是隨法行人明了法。遠離八邪向八正道。是第八人明了法。除滅衆結。斷生死漏。見真實諦。是須陀洹人明了法。觀味是患。知無往來。是斯陀舍人明了法。不樂三界。求盡有漏。於受生法。乃至一念不生愛著。是阿那舍人明了法。獲六神通。得八解脫。九定四辯。悉皆成就。是阿羅漢人明了法。性樂觀察。一味緣起。心常寂靜。知足少事。解因自得。悟不由他。成就種種神通智慧。是辟支佛人明了法。智慧廣大。諸根明利。常樂度脫一切衆生。勤修福智助道之法。如來所有。

十力無畏一切功德。具足圓滿。是菩薩人明了法。是爲十。若諸菩薩安住此法。則得如來無上大智明了法。

〔疏〕二明了法者。得不照達。求之何用。總以音賢勝

智。了知三乘凡聖差別。鈔總以音賢下。顯能了智。則是圓智了法。無法非圓。

今但約相。則一是凡夫若童稚蒙昧。未能出世故。所了通小耳。

隨世俗長四善根。長四善根。卽暖頂忍。世第一法。初地已廣。一謂鈍根。

隨信他言而行道故。名隨信行。三是利根。由自披

閱契經等法而行道故。名隨法行。然今旣云覺法

自性等。則知十中。前九亦兼含大。是以智論明有

三乘其十地法。此上二人約根分異。是以智論下引證成前通

大之義。天台引此。立於通教。通大。通小。通淺。通深。十地者。一乾慧地。二性地。三八人地。四見地。五薄

地。六離欲地。七已辦地。八辟支佛地。九菩薩地。十佛性地。廣如天台。四第八人者。即

初果向。又俱舍賢聖品中疏云。第八人者。謂苦法

忍。八忍之中。從後數之。為第八故。五初果法斷眾

結者。謂三正三隨。已如十地。亦可見所斷惑。八十

八使。名為眾結。由見諦理。斷無明漏。無明是生處

根本。名生處漏。三正三隨者。三正即涅槃經謂身見。戒取。疑。俱舍說斷其六。故加三

隨。邊見。隨身見。執斷常者。必依身故。見取。隨戒取。非因計因。必計勝故。邪見。隨疑。疑無之心。斷善根

故。六一來果。觀欲味過患。已斷六品。雖三品惑。能

潤一生故一往來而知無往來也七不還果斷九
 品盡故不還欲界乃至八地惑皆斷故總云不樂
 三界八無學果八解脫者一內有色觀外色解脫
 二內無色觀外色解脫三淨解脫初二如次依初
 二禪三依四禪次四無色為四解脫八即滅受想
 解脫餘義已見上文廣如諸論九十可知言解脫有八種
 者一內有色觀外色解脫謂於內身有色想貪為
 除此貪觀外不淨青瘀等色令貪不起故名解脫
 二內無色觀外色解脫謂於內身無色想貪雖
 已除貪為堅牢故觀外不淨青瘀等色令貪不起
 名為解脫第三淨解脫身作證具足任謂觀淨色
 令貪不起名淨解脫觀淨色者顯觀轉勝此淨解
 脫身中證得名身作證具足圓滿得任此定名具
 足任四無色定為次四解脫四解脫各能棄背下

地貪故。名爲解脫。後第八滅受想定解脫。身作證具足任。棄背受等。各爲解脫。

佛子。菩薩摩訶薩有十種修行法。何等爲十。所謂恭敬尊重諸善知識修行法。常爲諸天之所覺悟修行法。於諸佛所常懷慚愧修行法。哀愍衆生不捨生死修行法。事必究竟心無變動修行法。專念隨逐發大乘心諸菩薩衆精勤修學修行法。遠離邪見勤求正道修行法。摧破衆魔及煩惱業修行法。知諸衆生根性勝劣而爲說法令住佛地修行法。安住無邊廣大法界。除滅煩惱令身清淨修行法。是爲十。若諸菩薩安住其中。則得如來無上修行法。

疏三修行法者。如說修行。方得佛法。故常爲諸天者。爲字去聲。故晉經云。覺悟諸天。餘竝可知。上來造修行竟。

建安縣建東桂林坊信女張氏法名太
毓同孫佛續捐貲刊刻
華嚴經離世間品疏論纂要第九十五
卷伏願增崇人天勝福
晉度恩親同歸華藏
原熙十九年三月
華藏室謹題

大方廣佛華嚴經疏論纂要卷第九十五